



## *Sumariu Kazu*

Períodu : Outubru 2012  
Edisaun : 19 Outubru 2012

# **Sumáriu prosesu julgamentu kazu iha Tribunál Distritál Baucau primeíru no segundu semana fulan Outubru 2012**

## *Introdusaun*

Hahú husi loron 3, 4 no kontinua fali husi loron 8 -11 Outubru 2012, JSMP konsegue monitoriza kazu hamutuk 8 ne'ebé Tribunál Distritál Baucau julga. Kazu hirak ne'e kompostu husi krime violénsia doméstika 3, krime abuzu seksuál ba menor 2, krime violasaun seksuál 1, krime maus tratus 1 no krime ofensa ba integridade fízika simples ida.

Kazu hirak ne'e, balun hetan ona desizaun no balun seluk sei kontinua halo julgamentu. Hanesan ho edisaun sira seluk, sumáriu ida ne'e ho objetivu atu habelar informasaun ba lala'ók prosesu julgamentu iha Tribunál Distritál Baucau.

Tuir mai deskripsaun sumáriu julgamentu ho kompletu:

### **1. Kazu krime violénsia doméstika Nú. 123/Crm.S/2012**

Iha loron 03 Outubru 2012 Tribunál Distritál Baucau hala'ó julgamentu ba kazu violénsia doméstika ne'ebé julga ho Númeru Prosesu 123/Crm.S/2012.

Kazu ne'e involve arguidu ho inisiál EF hasoru vítima ho inisiál BF ne'ebé nu'udar arguidu nia oan rasik. Kazu ne'eakontese iha 18 Dezembru 2011, iha Ledatame, Suco Gariuai, Sub-distritu Baucau, Distritu Baucau.

Audiénsia julgamentu prejide husi juíz singulár Dr. Afonso Carmona, Ministériu públiku representa husi Dr. Adérito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Julgamentu hahú hodi lee akuzasauan Ministériu Púliku. Iha akuzasauan ne'e haktuir katak iha 18 Dezembru 2011, lorokraik arguidu haruka vítima ba dada bibi ne'ebé kexi hela iha to'os laran. Maibé vítima la kohi. nun'é arguidu nervozu hodi fatuk tuda no kona iha vítima nia kotuk laran.

Aktu ne'e kauza vítima sofre bubu no kanek iha parte kotuk. Bázeia ba aktu arguidu ne'e Ministériu Públiku akuza ho artigu: 156 Kódigu Penál.

Iha arguidu nia deklarasaun ba tribunál, hatudu katak arguidu konfesa faktus sira ne'ebé akuza hasoru nian.

Rona tiha deklarasaun arguidu tribunál kontinua ba alegasaun finál. Iha alegasaun Ministériu Públiku husu ba tribunál atu aplika pena suspensaun ba arguidu. Iha parte seluk defeza husu ba tribunál atu konsidera nia kliente hodi absolve husi krime ne'e tanbá agruidu konfesa, arepende ba nia hahalok no la iha antesidente kriminal ruma.

Depoisde alegasaun finál tribunál marka ba loron 7 Novembru 2012 tuku 14:30 ba leitura sentensa.

## **2. Kazu krime abuzu seksuál ba menor Nú 21/Crm.C/2012/TDB**

Iha 04 Outubru 2012 Tribunál Distritál Baucau hala'o julgamentu ho agenda leitura akordaun ba kazu krime abuzu seksuál ne'ebé involve Inocêncio L. Guterres hasoru vítima Ana Maria Viana ne'ebé hanesan arguidu nia aluna.

Tribunál rejista kazu ne'e ho Númeru Prosesu 21/Crm.C/2012/TDB. Kazu ne'e akontese iha 28 Setembru 2010, iha Suco Samalari, Sub-distritu Baguia, Distritu Baucau.

Audiénsia lee leitura akordaun prejide husi juíz singulár Dr. José Gonçalves, Ministériu Públiku representa husi Dra. Bemvinda da Costa do Rosário no arguidu akompaña husi Dr. Gregório de Lima husi Defensória Públiku.

Ministériu Públiku akuza arguidu nu'udar autór materiál ba krime abuzu seksuál ba menor ne'ebé prevê iha artigu: 177 Kódigu Penál hasoru vítima. Iha audiénsia julgamentu tribunál konvensidu katak arguidu provadu komete krime abuzu seksuál hasoru vítima.

Iha akuzasaun Ministériu Públiku ninia deskreve katak iha 28 Setembru 2010 kalan arguidu ba iha vítima nia fatin, kolu tiha vítima nia roupa, ameasa vítima no loke vítima nia kelen hodi hatama nia penis ba iha vítima nia vagina to'o hetan ezekulasaun. Mezmu nune'é, iha julgamentu laran wainhira tribunál fo tempu ba arguidu atu fo ninia deklarasaun, arguidu nega totál faktu ne'ebé akuza ba nia tanbá akuzasaun hirak ne'e falsa.

Mesmu nune'e, depoisde halo avaliasaun ba provas no sirkunstansia asociadu ho kazu ne'e, ikus mai tribunál konklui no kondena arguidu ba pena prizaun tinan 10 ba arguidu.

## **3. Kazu krime ofensa ba integridade fízika simples Nú. 48/Crm.S/2012/TDB**

Iha 04 Outubru 2012 Tribunál Distritál Baucau hala'ó julgamentu hodi halo tentative konsiliaun ba kazu krime ofensa ba integridade fízika simples ne'ebé julga ho Númeru Prosesu 48/Crm.S/2012/TDB.

Kazu ne'e involve João Amaral hasoru vítima Claudino Pereira Tavares. Kazu ne'e akontese iha 5 Marsu 2011, iha Nahareca, Sub-istritu Ossu, Distritu Viqueque.

Audiência julgamento ba kazu ne'e prejide husi juiz singular Dr. António Fonseca Monteiro, husi Ministério Público representa husi Dr. Pascasio de Rosa Alves no arguidu hetan defeza husi Dr. Gregório de Lima husi escritório Defensoria Pública.

Hafoin rona tiha iniciativa husi parte rua atu dame malu, tanbá arguidu prontu atu fo indemnizasaun ho valor osan US\$. 50.00 ba vítima. Tanba ne'e, tribunal ofisiozamente halo deit homologasaun ba akordu ne'e.

#### **4. Kazu krime violéncia doméstika Nú. 40/Crm.S/2012/TDB**

Iha 04 Outubru 2012 Tribunal Distritál Baucau kontinua hala'ó julgamento leitura sentensa ba krime violéncia doméstika ne'ebé rejista ho Número Prosesu 40/Crm.S/2012/TDB.

Kazu ne'e involve José da Costa hasoru nia aman Kaideku, ne'ebé akontese iha lora 2 Setembru 2011 iha Caisidu, Baucau.

Audiência leitura sentensa ne'e prezide husi juiz singular Dr. António Fonseca Monteiro, Ministério Público representa husi Dr. Pascasio de Rosa Alves no arguidu akompaña husi Dr. Gregório de Lima husi Defensoria Pública.

Ministériu Públiku akuza arguidu nu'udar autor material ba krime violéncia Doméstika ne'ebé prevê iha artigo 145 Código Penal kónjuga ho artigo 35 Lei Kontra Violéncia Doméstika.

Relaciona ho arguidu nia hahalok ne'e tribunal konklui hodi kondena pena prizaun fulan 5 no suspende ba tinan 1 kondena mós arguidu selu kusta judisiáriu US\$. 20.00.

#### **5. Kazu krime abuzu seksuál ba menor Nú. 133/Crm.C/2012/TDB**

Iha lora 8 Outubru 2012 Tribunal Distritál Baucau hala'ó julgamento ba kazu krime abuzu seksuál. Kazu ne'e involve husi arguidu ho inisial DCB hasoru nia oan fetu NJB, ne'ebé akontese iha 14 Outubru 2010, iha Aldeia Kakae Uma, Suco Aubeon, Sub-Distritu Manatuto, Distritu Manatuto

Juizes kolektivu Dra. Ângela Faria Belo, Dr. Afonso Carmona no Dr. José Gonçalves mak prejide julgamento ne'e, Ministério público representa husi Dra. Bemvinda da Costa do Rosário no arguidu hetan defeza husi Dr. Rui Maria Guterres.

Audiência julgamento ba kazu ne'e taka ba público tanba atu proteze interesse diak ba vítima tuir lei haruka. Bázeia ba informasaun ne'ebé JSMP rekolla husi tribunal katak Ministeriu Públiku akuza arguidu ho artigo 177 Código Penal kónjuga ho artigo: 35 Lei Kontra Violéncia Doméstika.

Iha audiência julgamento ne'e tribunal rona deklarasaun husi arguidu no vítima. Depoisde rona parte sira tribunal kontinua ba alegasaun final .

Julgamentu leitura akordaun ba kazu ne'e marka fali iha 19 Outubru 2012 iha oras 14:00 lokraik.

## **6. Kazu krime violasaun seksuál Nú. 144/Crm.C/2012/TDB**

Iha 9 Outubru 2012 Tribunál Distritál Baucau hala'ó julgamentu ba kazu krime violasaun seksuál ne'ebé involve arguidu BF hasoru vítima AFB.

Kazu ne'e rejista iho Númeru Prosesu 144/Crm.C/2012/TDB, ne'ebé akontese iha 21 Dezembru 2011 iha Aldeia Sirilacu, Suco Namanei, Sub-distritu Quelecai, Distritu Baucau.

Audiénsia julgamentu ba kazu ne'e prezide husi juízes kolektivu ne'ebé kompostu husi Dr. Afonso Carmona, Dra. Ângela F. Belo no Dr. José Gonçalves, Ministériu Públiku representa husi Dr. Adérito Tilman no Arguidu hetan defeza husi Dr. Rui Manuel Guterres husi Defensória Públiku.

Audiénsia julgamentu ba kazu ne'e taka ba Públiku. Tuir informasaun ne'ebé JSMP rekolla husi ofisiál tribunál ba kazu ne'e katak Ministériu Públiku akuza arguidu ho artigu 172 Kódigu Penál. Iha audiénsia ne'e tribunál rona deklarasaun husi parte sira no alegasaun finál husi Ministériu Públiku.

Depoizde rona tiha deklarasaun no alegasaun finál, tribunál marka atu halo leitura akordaun iha lora 19 Outubru 2012.

## **7. Kazu krime maus tratus ba kónjuje. Nú. 08/Crm.C/2012/TDB**

Iha 11 Outubru 2012 Tribunál Distritál Baucau hala'ó audiénsia julgamentu leitura akordaun ba kazu krime maus tarsus ba kónjuje. Kazu ne'e rejista iha tribunál ho Númeru Prosesu 08/Crm.C/2012/TDB.

Kazu ne'e involve Tomas de Fatima hasoru nia kónjuje Guilhermina Fatima de Araújo, ne'ebé akontese iha lora 29 Janeiru 2011, iha Aldeia Acauata, Suco Uailaha, Sub-Distritu Venilale, Distritu Baucau.

Julgamentu ne'e prejide husi Juíz singulár Dr. José Gonçalves, Dra. Bemvinda da Costa do Rosário Ministériu Públiku repezenta husi Dra. Bemvinda da Costa do Rosário no arguidu akompaña husi Dr. Rui Maria Guterres husi Defensória Públiku.

Ministériu Públiku akuza arguidu nu'udar autór materiál ba krime maus tratus ba nia kónjuje ne'ebé prevê iha artigu 154 Kódigu Penál.

Iha akuzasaun Ministériu Públiku nian haktuir katak iha lora 29 Janeiru 2011 arguidu hodi katana baku ba vítima nia ulun dala haat, iha nia kotuk laran dala haat, iha liman fuan dala ida, baku iha ain, no katana nia tutun kona iha vítima nia ain to'o kanek no kontinua hodi kopy tuda ba vítima nia hasan.

Aktu ne'e rezulta vítima sofre kanek iha ulun no hetan suku pontu haat (4). Aleinde ne'e vítima nia liman fuan naksalak, kotuk laran bubu no ain kabun hetan kanek.

Depoide avalia prosesu tomak husi kazu ne'e, tribunál konvensidu katak arguidu provadu komete krime maus tratus ba nia kónjuje ne'ebé defini iha artigu 154 Kódigu Penál.

Relasiona ho arguidu nia hahalok ne'e, tribunál konklui hodi aplika pena prizaun tinan 2 no suspende ba tinan 2.

## **8. Kazu krime violénsia doméstika Nú. 102/Crm.S/2012/TDB**

Iha 11 Outubru 2012 Tribunál Distritál Baucau kontinua hala'ó julgamentu hodi halo leitura sentensa ba kazu krime violénsia doméstika ne'ebé involve husi Manuel C. de Almeida hasoru nia kónjuje Josefina da Costa Freitas.

Kazu ne'e rejista iha tribunál ho Númeru Prosesu:102/Crm.S/2012/TDB no akontese iha loraun 9 Outubru 2011, iha Bucate, Suco Liaruca, Sub-Distritu Ossu, Distritu Viqueque.

Julgamentu ba kazu ne'e prezide husi juíz singulár Dr. Afonso Carmona, Ministériu Públiku reprezenta husi Dr. Pascasio de Rosa Alves no arguidu hetan akompaña husi Dr. Rui M. Guterres husi Defensória Públiku.

Iha julgamentu ne'e tribunál konvensidu katak arguidu Manuel C. de Almeida provadu duni nu'udar autór materiál ne'ebé prátika krime violénsia doméstika hasoru vítima Josefina da Costa Freitas.

Bázeia ba faktus provadus ne'ebé produs durante julgamentu, tribunál konklui hodi aplika pena prizaun tinan 1 no suspende ba tinan 1.

Atu hatene informasaun kle'an favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883